

Toribio Alzaga teatro-saria dela-ta «Epai-maia'koak ao batez erabaki dute saria «Laratzean sua» iru ekitaldi dituan Teatro lanari ematea, besteak baño obegotzat jotzen dutelako. Egillea: Carrasquedo Olarra jauna da. Orobat erabaki dute aipamen berezia merezi dutela beste iru antzerki-lan auexek: 1.º «Nor errudun?», Xabier Gereño jaunarena. 2.º, «Brokel jauna», J. Antonio Arkotxa jaunarena. 3.º, «Biotzaren neurria», Pedro Sarrigi jaunarena. Donostia'n, 1965 Agorraren 24'n. Antonio M.ª Labayen, Agustin Zubikarai, Gabriel Aresti.» Ala jakiñerazi bekio Bizkaiko Ahorro Kazari.

Laguntzaille izendatu dira aurkeztuak zeuden lagun oek: Franzisko Altuna, S. I., J. Antonio Arkotxa, Jose Azurmendi, O. F. M., Iñaki Barriola, Juan Jose Beloki, Iñaki Beobide, Antonio Bilbao, Aita Felix Bilbao, Jean Curutchet, Jean Louis Davant, Jean-Baptiste Dirassar, Pierre Duhour, Aita Emiliano karmeldarra, Jesus Elozegi, Jacques Etcheverry, Toribio Etxebarria, Karmelo Etxenagusia (Derio'ko irakaslea), Juan Garmendia (Zeleta), Salbador Garmendia, Xabier Gereño, Anjel Goenaga, S. I., Iñazio Goikoetxea (Gaztelu), Juan Goikoetxea, S. I., Juan Goikoetxea (Arbizu'ko apaiza), Mikel Lasa, Aita Luis M.ª Mujika, Jose Olaizola, Jesús M.ª Oleaga, Josu Oregi, Gabriel Zapiain, Manuel Ziarsolo, eta Rudolf de Rijk.

Aurrerantzean, laguntzailleak, izenak abuztuko batzarrean aurkeztu ondoren, urte-buruan autatuko dira. Datorren urtekoak izendatu baño lehen, gaiñera, finkaturik utziko da ea zenbat autatu bear diren.

Mitxelena'k esan du, lanpeturik dagoelako eta batez ere oraingoz Euskalerritik kanpora joan bearko duelako, idazkaritza utzi bearrean aurkitzen dela, il onetako batzarreko gauzak egin ondoren.

Arrue'k aditzera eman du, Suezia'n egon denean, Euskaltzaindiaren agurra bidali diola Nils M. Holmer euskalariari, berarekin egoterik izan ez badu ere.

Oi den otoiitez asi eta bukatu da batzarrea.

*Euskaltzainburuordea*

A. IRIGARAY

*Idazlaría*

LUIS MITXELENA

Donostian, Diputazioan, 1965-X-29.

Bildu dira: Lekuona, buru, Lafitte, Villasante, Satrustegi, Haritschelbar, Larzabal, San Martín, Barandiaran, Irigaray, Arrue ta Irigoyen euskaltzaiñiak. Artola ta Zatarain laguntzailleak.

Eppherre, Dassance ta Labayen-ek ezin etorria adierazi dute.

Aurreko batzarreko agiria irakurri eta ontzat artu da.

Arrue-k asiera emanik Euskaltzaindiak bere poza agertzen du Barandiaran jauna gure artean ikusteaz.

Donostiko C. A. T.-ren karta irakurri da. Zorionak ematen dizkigute urtearen buruan egindako lanagatik eta batez ere oraintsu Donostian, teatroa gaitzat artuta, antolatu diran itzaldiakatik.

Eskerrak eman bekiziko Donostiako Ayuntamentuko «Comisión de Cultura»-ri, Rufino Mendiola jauna ere aipatuaz, gorago esan diran itzaldiak antolatzeke artu cegun laguntasunagatik.

Bera aurrean badago ere Barandiaran-en karta irakurri da eta bertan eskerrak ematen ditu izendapenagatik.

Arruza-k bialduta, Tovar-ek bere karta idigiari egin dion erantzunaren kopia bat irakurri da.

«Asociación Guerediaga de Amigos de la Merindad de Durango» urriaren 30 eta azaroaren 1 eta 2-rako euskal liburu ta diskoen lendarizko azoka prestatzen ari da Durango-n eta Euskaltzaindiari ere eskatu dio bere liburuak eraman ditzan salgai jartzeko. Ala egin bedi.

Bizkaiko Ahorro Kaxa-k urriaren 30-ean emango du teatro saria Bilbon. Programa bialdu digu gomitatuz.

Lekuona-k dio Orixe-z liburu bat laster ateratzeko dala eta Euskaltzaindiaren ardurapean egitea nai litzakeala. Ala egin bedi.

Badió ere datorren ilbeltzean dirala berreun urte Larramendi il zala. Egoki litzake zerbait egingo balitz bere omenez.

Lafitte-k esan du datorren illeko batzarrea Bayona-n, Musée Basque-n, egin genezakeala zenbait itzaldi prestatuz. Zecatasunak ere aipatu dira. Egin bedi.

Haritschelhar-ek zenbait gauza ekarri ditu entzuleen gogora Frantziako batxilerrato ta estudio nagusien erreforma ta euskera dirala-ta. Atseginiez beterik entzun dira ekarri dituen berri pozgarriak eta datorren illeko batzarrean egingo duen itzal-diaren gaia ain zuzen ere orixe izango da. Gaiñera itz egingo dute: Lafitte-k jakitatezko liburuez eta Satrustegi-k «Euskaltzaindia zer den. Zer espero dan laguntzailleengandik» gaiaz.

San Martin-ek dio Altube-ren zenbait liburu argitaratzea nola asko komeni dan gauza dan. Esaterako «La Vida del Euskera» ta «Erderrismos». Batzarrean daudenak ere iritzi berekoak dira. Nola argitaratu arakatu bedi. Badio ere nola euskal autore zaharren antolojia on baten faltan gauden eta ortan zerbait egin bear litzakeala. Bizkaiko bat Karmelo Etxenagusia jauna prestatzen ari da eta besteetakoa ere egin bear litzake. Estudiatu bedi nola aurrera eraman ain bearrezkoa dan asmo au.

Barandiaran-i galdetu zaio Iruñeko Unibersidadean euskal gaietan zer egiten dan eta ortaz aritu da. Eskerrak eta zorionak eman bekioz ain lan bikaiñagatik. Oi den otoitzarekin asi eta bukatu da batzarrea.

*Euskaltzainburuordea*  
MANUEL LEKUONA

*Idazlariordea*  
ALFONSO IRIGOYEN

Donostian, Diputazioan, 1965-XII-31-an.

Bildu dira: Dassance, buru, Lafitte, Eppherre, Lekuona, Villasante, Satrustegi, Irigaray, Larzabal, Arrue, San Martín eta Irigoyen euskaltzaiñak. Etxaniz, Aita Emiliano Barandiaran, Anai Berriotxoa, Altuna, Lasa, Arregi, Elosegui, Artetxe, Santamaria, Zatarain eta Olaizola laguntzailleak.

Ezin etorria adierazi dute Barandiaran, Lojendio, Mitxelena eta Oleaga-k.

Dassance-k itz batzuk egin ditu asteko.

Urriko agiria irakurri da eta ontzat artu da. Azaroan batzarrea agirian egin zan Bayona-ko Museon.